



Il trenin da model da la Viafier Retica per collecziunaders paschiunads, go for it.

FOTOS EBAY.COM

COLUMNA

Regalins per Rumantschuns

SANDRO BUCHLI/FMR

Temp da Nadal – temp da regals. Ma tge diavel regalar ad in Rumantschun? Pia ad in da quels propi propi Rumantschs u ina propi Rumantscha. Per in da quels freaks che s'engascha en da tuttas sorts uniuns da lingua e cultura u che sfeglia gugent en dicziunaris e vocabularis e pledaris, sch'il di è lung. Per in da quels che vegn lura satrà in bel di sper l'Ischi en il Curtin d'onur a Trun. **MINIMUM!** Il Rumantschun, in estet passiuà, in tip critic, in fervent guarda-Telesguard ed in «legia-La-Quotidiana» tutti giorni. Er quel festivescha gugent Nadal! Ed er quel avra gugent pachettins.

La FMR fa perquai trais propostas da regalins per Rumantschuns. Per che la festa da Nadal cun il Rumantschun u la Rumantschuna da tes cor daventia in vair success! Nus avain ordinà ils regalins tenor pretsch! Remartga preliminar: Dal tut low-budget n'èsi betg! Però il plaschair da tes Rumantschun vegn ad esser grond. Scumettain?

Regalin nr. 1: L'Nouf S. Testamaint dal 1640

Nagin scherzo. Quest testament, ina translaziun putera da Joan Griti da Zuoz da l'onn 1640, stampà e lià a Basilea sa fa bain sut mintga pignol

da Nadal! Mintga Rumantschun avess numnadamain gugent ina da las emprimas biblas stampadas en lingua rumantscha. Cler, i n'è betg gist in Jachiam Bifrun u in Durich Chiampell dal 16avel tschientaner – però anc adina ok, uschè ditg ch'il Rumantschun è reformà. Sch'el è numnadamain fitg catolic, lura lascha meglier la detta da questas scrittiras reformatoricas. Però atenziun: Il pretsch! Per bun 1995 dollars americans (!) tutga questa bibla a tes Rumantschun dal cor! Il vendader sin ebay è in collecziunader american. I vegnan pia anc latiers custs da porto e custs da duana per transportar la bibla sur mar...

Regalin nr. 2: In trenin model rumantsch da la Viafier retica

Quest regalin numer dus è ideal per tes Rumantschun cun flair per l'ecologia e per la Viafier retica. I sa tracta numnadamain dad ina locomotiva miniatura fitg rara: La veglia locomotiva da reclama da Radiotelevisiun Svizra Rumantscha. Voilà, tes Rumantschun vegn a bitschar tai. Però er qua ha il bitsch da tes Rumantschun ses pretsch: 399,99 euros. Ed er qua vala: Il regalin vegn dad in collecziunader da Berlin, custs da porto n'èn betg inclus. Ok, uschè ecologic n'èsi pia betg! Persuenter è quest regalin – Tes Rumantschun vegn a far sigls da legria.


Regalin nr. 3: La buttiglia d'aua minerala da Not Vital

Cumprar in'ovra da l'artist engiadinais *Not Vital* – per lez dovri in pau monetas sin tes conto privat sin las Inslas Cayman. Ussa però has er ti Otto Normalo ina schanza da cumprar in «Not Vital». Evian, la firma d'aua minerala al Lai da Geneva (na tutga betg a Nestlé, però al multi-concern «Danone») producescha dapi onns ediziuns limitadas dad aua minerala en corporaziun cun artistas ed artists da num e pum. Quest onn ha Not Vital già la chaschun da crear ina bella buttiglia cun in pèr bellas bottas da naiv alvas. Da cumprar ina tala buttiglia n'è betg uschè simpel, però la FMR ha chattà in pèr vendaders sin Ebay en Frantscha ed en Engalterra. Pretsch: Per tranter 30 e 100 francs pos ti laschar sgular nà da Londra u da Paris enfin sut tes pigniel da Nadal l'aua minerala «vitala». Quai è bain era in pau bler Co2, ma hej – Tes Rumantschun vegn a baiver quell'aua cun in gustun.

Tgi che ha propi propi interess dad in da quests regalins, l'autur trametta gugent ils links! Pitschen tip: Endatai ina giada «Rumantsch» sin plattafurmas d'aucziun sco www.ebay.com. Là chattais ulteriura rauba magari interessanta per Rumantschunas e Rumantschuns. Bellas Festas!



Evian X Moncler ediziun limitada da Not Vital – Quai tuna bain bain e va giu sco aua.



«Romansh New Testament», l'emprima translaziun da Griti da l'onn 1640. Lià cun metal – però reformà!